

Piginneqatigiilluni inissiat pillugit Inatsisartut inatsisaat

Kapitali 1

Atuuffii ilaalu ilanngullugit

§ 1. Inatsisartut inatsisaat manna piginneqatigiilluni inissiaatillit peqatigiiffiinnut atuuppoq, tassani ilaasortaanernut ataasiakkaanut tamaginnut inissiamut najugaqarfigineqartussamut atuisinnaatitaaneq atatinneqarluni.

Imm. 2. Piginneqatigiilluni inissiaatillit peqatigiiffiat ataaseq ikinnerpaamik pingasunik najugaqarfusumik inissiarqassaaq.

Imm.3. Piginneqatigiilluni inissiaatit inissiatut quleriaatut imaluunniit eqimasutut-pukkitsutut sananeqassapput, tamarmik immikkut silamiit isertarfeqassallutik, namminerisaminnik igaffeqassallutik igasarfeqassallutilluunniit, kiisalu uffarfeqassallutik perusuersartarfeqassallutillu. Piginneqatigiilluni inissiat pissusissamisoortumik ataatsimoortutut ilusiligaassapput.

Imm. 4. Pissutsini immikkut ittuni piginneqatigiilluni inissiat ilaqutariinnut ataatsinut inissiatut imaluunniit illutut affarleriittut sananeqarnissaat tiguneqarnissaalluunniit kommunalbestyrelsip akuerisinnaavaa.

§ 2. Piginneqatigiilluni inissiaatillit peqatigiiffiannut imaluunniit piginneqataasumut nutaanik inissialiornissamut imaluunniit pisinissamut imaluunniit kommunip inissiaataanik attartortittakkamik tigusinissamut taarsigassarsititsinermut atugassarititaasut, piginneqatigiilluni inissiaatillit peqatigiiffiata imaluunniit piginneqataasup illuut imaluunniit piginneqatigiilluni inissiaatillit peqatigiiffiata ingerlanneqarnera pillugu aalajangiisinnaatitaaneranut sunniuteqartarnissaq imaluunniit annikillitsinissaq, Inatsisartut inatsisaanni matumani maleruagassat malillugit pisussat saniatigut, piumasaqaatigineqarsinnaanngilaq.

Kapitali 2

Nutaanik inissialiornissamut taarsigassarsiarititat

Taarsigassarsiarititanut killiliussat

§ 3. Kommunalbestyrelsi piginneqatigiilluni inissiaatillit peqatigiiffiata inissianik nutaanik sanaartornissaanut imaluunniit pisinissaanut aningaasartuutit tamarmiusut ilaannakortumik aningaasalersornissaannut taarsigassarsititsinnaavoq.

Imm. 2. Taarsigassarsiarititat, inissiaq anginerunersoq apeqquatainnagu, inissiami inissiap annertussusaanut annerpaamik 110 m² angullugu tunniunneqarsinnaapput.

Imm. 3. Taarsigassarsiarititat aningaasartuutit annertunerunersut apeqquatainnagu, aningaasartuutitut tamarmiusunut annerpaamik m²-imut kr. 20.000-it angullugit tunniunneqarsinnaapput.

Imm. 4. Piginneqataasut ataasiakkaat aningaasartuutit tamarmiusut imaluunniit inissiap piginneqataasup atuisussaataaffigiligassaata nalingata piginneqataasut akornanni iluarsineqartup 5 %-iannik siulequtsiillutik akiliuteqarpata, aatsaat taarsigassarsiat tunniunneqarsinnaapput.

Imm. 5. Aningaasartuutinit tamarmiusunit sinneruttut, piginneqatigiilluni inissiaatillit peqatigiiffiata nammineerluni aningaasalersussavai.

§ 4. Kommunalbestyrelsi Nuummi sulianut aningaasartuutissat tamarmiusut 45 %-ii tikillugit taarsigassarsititsisinnaavoq, taamaattorli taakku annerpaaffissaat § 3, imm. 2 aamma 3 naapertorlugit naatsorsorneqassapput, tassalu inissiamut ataatsimut taarsigassarsiarititassat annerpaamik 990.000 koruuniussallutik.

§ 5. Kommunalbestyrelsi Qaqortumi, Sisimiuni, Aasianni Ilulissanilu sulianut aningaasartuutissat tamarmiusut 55 %-ii tikillugit taarsigassarsititsisinnaavoq, taamaattorli taakku annerpaaffissaat § 3, imm. 2 aamma 3 naapertorlugit naatsorsorneqassapput, tassalu inissiamut ataatsimut taarsigassarsiarititassat annerpaamik 1.210.000 koruuniussallutik.

§ 6. Kommunalbestyrelsi Maniitsumi Tasiilamilu sulianut aningaasartuutissat tamarmiusut 60 %-ii tikillugit taarsigassarsititsisinnaavoq, taamaattorli taakku annerpaamik § 3, imm. 2 aamma 3 naapertorlugit naatsorsorneqassapput, tassalu inissiamut ataatsimut taarsigassarsiarititassat annerpaamik 1.320.000 koruuniussallutik.

§ 7. Kommunalbestyrelsi illoqarfinni allani nunaqarfinnilu sulianut aningaasartuutissat tamarmiusut 65 %-ii tikillugit taarsigassarsititsisinnaavoq, taamaattorli taakku annerpaamik § 3, imm. 2 aamma 3 naapertorlugit naatsorsorneqassapput, tassalu inissiamut ataatsimut taarsigassarsiarititassat annerpaamik 1.430.000 koruuniussallutik.

§ 8. Piginneqatigiilluni inissiami inigisap annertussusaa inissiami init tamarmik annertussusaattut naatsorsorneqassaaq. Pequusiviit, quit, aneersuartarfiit, biilinit oqquisitsiviit biililluunniit unittarfi qulisat, illup silammut iigaasa avataaniittut imaluunniit inissiamit immikkoortillugit inissitat, oqorsarlugit inigisassatut atorineqassanngippata, naatsorsuinermit ilanngunneqassanngillat.

Imm. 2. Inigisap annertussusaa imatut naatsorsorneqassaaq:

1) Naqqup ataani inigisap annertussusaa, naqqup ataata silammut iigaaniit takissusaa silissusaanut amerlisillugu, uuttorneqassaaq. Naqqup ataa tamakkerluni atorineqanngippat, iikkat ilorliit, ininut naatsorsuinermit ilaatinneqartunut killiliisut qeqqiniit inigisap annertussusaa naatsorsorneqassaaq. Init naqqi tamakkerlutik cementimik betonimilluunniit qalligaanngitsut naatsorsuinermit ilaatinneqassanngillat.

2) Inini quleriiaani nalinginnaasuniittuni, inissiami ataatsimi silataani iikkamiit imaluunniit qaliata silataaniit, takuuk nr. 3, aamma inissiat akunnequtaasa qeqqanniit uuttorlugu, takissusaa silissusaanut

amerlisillugu, inigisap annertussusaa naatsorsorneqassaaq. Ilaqutariinnut arlalinnut inissiani illup isui naatsorsuineri inissiat akunnequtaasa affaattut ilanngunneqassapput. Qisuit qalliutit marluuppata, silataani qisummit allermiit uuttuisoqassaaq.

3) Qaliani inigisap annertussusaata naatsorsornerani illup takissusaa silissusaanut amerlisillugu naatsorsorneqassaaq. Takissusaa inini quleriiaani ataatsitut nalinginnaasutut uuttorneqassaaq, silissusaalu illup silataani qaliat qaavisa qaliap naqqaniit 1,5 meterinik portussuseqartut akornanni ungasissusaattut uuttorneqassalluni. Aniinganerit, soorlu qaliani aniingarnit iikkat inimut killiliissutaasut silataannut uuttorneqassapput.

Imm. 3. Naqqup ataani qalianilu inigisap annertussusaa, takuuk imm. 2, nr. 1 aamma nr. 3, aatsaat init najugaqarfissatut suliarineqarsimappata ilanngunneqassapput.

Imm. 4. Init aalaakkaasumik natiligaanngitsut uuttortaanermut ilanngunneqassanngillat, taamaattorli takuuk imm. 5.

Imm. 5. Inissiap iluani majuartarfiit naatsorsuineri inini quleriiaani tamani aqquteqarfigisaannut ilanngunneqassapput. Torsuusat, majuartarfiit majuartarfiillu sangoriaat ataatsimoorussat, illumi ininut kiassakkanut qallersuutit iluiniittut naapertuuttumik, annerpaamilli 11 m²-inik annertussusilerlugit naatsorsuineri ilanngunneqassapput.

§ 9. M²-imut inissiamut aningaasartuutit sanaartornermut aningaasartuutitut tamarmiusut naatsorsorneqassapput, inissiat ataatsimut m²-imut annertussusaannut agguarlugu.

Imm. 2. Aningaasartuutini tamakkiisuni sanaartornermut atatillugu aningaasartuutissat tamarmik ilaatinneqarsinnaapput.

Qularnaveeqqusiussaq

§ 10. Kommunalbestyrelsip taarsigassarsiarititaat piginneqatigiilluni inissiaatillit peqatigiiffiata illuutaasa qularnaveeqqusiunneqarnerisigut qularnaarneqassapput. Taarsigassarsiat piginneqatigiilluni inissiaatillit peqatigiiffiata illuutaa qularnaveeqqusiullugu sanaartornermut aningaasartuutinit tamakkiisunit sinneruttunut aningaasalersuutissatut taarsigassarsiarititaasimasut akilereernerini, akilernerneqartussatut inissisimassaaq.

Imm. 2. Taarsigassarsiarititat atuilernissamut akuersissutip imaluunniit illuutip tiguneqarnerata ullua aallarnerfigalugu ukiut 30-it tikillugit ernialersugaanatillu akilersugassaangillat, tamatuma kingorna Nationalbankip ernialiusaa 3 procentpointinik ilallugu annertussusilimmik erniaqartillugit, ukiut 15-it tikillugit taarsigassarsiatut annertoqqatigiimmik akilersorneqartussatut, akilersorneqassallutik.

Imm. 3. Taarsigassarsiat akilersorneqartarnerat aammalu akilersuutininik akiliisarneq pillugit maleruagassanik Naalakkersuisut aalajangersaasinnaapput.

Taarsigassarsititsinissamik neriorsuuteqarneq

§ 11. Inissianik sanaartornissamut taarsigassarsinissamik allakkatigut qinnuteqaatit kommunalbestyrelsimi suliarisassanngorlugit nassiunneqassapput.

Imm. 2. Qinnuteqaammut ilanngunneqassapput:

1) Pilersitsineriisumut isumaqatigiissut, pilersitsisunit tamanit atsiorneqarsimasooq.

- 2) Piginneqatigiilluni inissiatillit malittarisassa.
- 3) Pilersaarusiarnut nassuiaat, inissiat amerlassusaannik inigisallu katillugit annertussusaannik paasissutissartalik.
- 4) Sananermut aningaasartuutit tamakkiisut takussutissiornerat.
- 5) Piginneqatigiilluni inissiatillit peqatigiiffiannut nunaminertamik inniminniineq imaluunniit atugassiineq.
- 6) Piginneqataasut aamma piginneqatigiilluni inissiatillit peqatigiiffiata namminneerlutik aningaasalersuutissaminnik pissarsisinnaanernut uppersa.

§ 12. Qinnuteqaat nassiuqqartoq tunngavigalugu taarsigassarsititsinissamik neriorsuut qinnutiginartoq tunniunneqarsinnaersoq, kommunalbestyrelsi aalajangiissaaq.

Imm. 2. Taarsigassarsiarititassat akuersissutiginenqarnissaannut piumasarineqarpoq:

- 1) Sanasussanut akigitinneqartussat pillugit pisussaaffiliisumik isumaqatigiissuteqartoqarsimannginnissaa, aammalu sanaartugassat aallartinneqarsimannginnissaat.
- 2) Illuliornerup immikkoortuini tamaginni peqatigiiffiup soqutigisaasa isumaginissaannut illuliornermut sulianut piginnaasaqartumik, piginneqatigiilluni inissiatillit peqatigiiffiata pissarsisimanissaa.
- 3) Sanaartukkami piffissami sanaartorfiusumi sanaartornermut pilersaarusiornermullu inatsisit atuuttut naammassineqarsimanissaat.

Imm. 3. Siunnersortitut sulianut ilisimasaqartutut isigineqarput inuit imaluunniit suliffeqarfiit, illussanik titartaasartutut, illuliornermi ilusilersuisartutut, illuliornermi ingeniøritut assigisaannilluunniit ilinniagaqarsimanermik tunuliaqutaqartut. Siunnersortimut isumaqatigiissut atugassarititaasut nalinginnaasut tunngavigalugit isumaqatigiissutiginenqassaaq aammalu tassani sanaartornerup nalaani nakkutilliineq ilaatinneqassalluni.

Imm. 4. Illuliornermik ilisimasalinnik siunnersortissarsisarneq tamatumalu annertussusissaa pillugit maleruagassanik Naalakkersuisut aalajangersaasinnaapput.

Imm. 5. Digitalimik illuliornermut suliassanik aqutsinermik atuinnissaq pillugu maleruagassanik Naalakkersuit aalajangersaasinnaapput.

§ 13. Kommunalestyrelsip qinnuteqaat akuerippagu, kommunalestyrelsi taarsigassarsititsinissamik neriorsuummik tunniussissaaq, tassanilu taarsigassarsiarititassat amerlassuserigallagassaat taarsigassarsititsinermullu atugassarititaasut allassimassapput.

Imm. 2. Taarsigassarsiarititassat inaarutaasumik annertussusissaat, sanaartornermut naatsorsuutit arlaannaannulluunniit attuumassuteqanngitsumit akuerisat tunngavigalugit naatsorsorneqassapput.

Imm. 3. Sanaartornermut aningaasartuutissanut missingersuusat, taarsigassarsiat akuerineqarnerannut tunngaviusimasut allannguuteqarpata, aammalu allannguutit taarsigassarsiat inaarutaasumik annertussusissaannut sunniuteqartussanngorpata, piginneqatigiilluni inissiatillit peqatigiiffiata tunngavissaqanngitsumik kinguarsaanartaqanngitsumik tamanna kommunalestyrelsimut nalunaarutigissavaa. Tamanna pinngippat taarsigassarsiat inaarutaasut neriorsuutiginenqartunit annertunerulersinneqasinnaangillat.

§ 14. Sanaartorneq kommunalestyrelsimut taarsigassarsititsinissamik neriorsuutitut allakkiap suliarineqarnerani ulluiussamiit ukiut marluk qaangiutsinnagit aallartinneqarsimassaaq, aammalu ukiut

pingasut qaangiutsinnagit naammassineqarsimassalluni atorneqalersimassallunilu. Tamanna pinngippat neriorsuut siumut ilisimatitsinertaqanngitsumik atorunnaarsinneqassaaq.

Imm. 2. Piginneqatigiilluni inissiatillit peqatigiiffiat taarsigassarsititsinissamik neriorsuutitut allakkiap suliarineqarnerani ulluliussamiit ukiut marluk qaangiutsinnagit sanaartorneq aallartinneqareersimanersooq aallartinneqareersimannginnorsorluunniit pillugu paasissutissanik kommunalbestyrelsimut nassiussissaaq. Sanaartorneq aallartinneqareersimappat tamanna pillugu nalunaarut, piginneqatigiilluni inissiatillit peqatigiiffiata suliarisimasaa aammalu kommunip teknikkimut ingerlatsiviani sumiiffimmiittumi uppersarsarneqarsimasooq ilanngunneqassaaq.

Imm. 3. Piginneqatigiilluni inissiatillit peqatigiiffiata taarsigassarsititsinissamik neriorsuutitut allakkiap suliarineqarnerani ulluliussamiit ukiut pingasut qaangiutsinnagit kommunalbestyrelsimut atuilernissamut akuersissutip assilinera nassiutissavaa.

Imm. 4. Sanaartornerup kinguaattoornerani kommunalbestyrelsip inassuteqareerneratigut imm. 1-imi piffissamut killissarititassatut allassimasut saneqqunneqarnissaannut immikkut ittumik Kommunalbestyrelsi akuersissuteqarsinnaavoq.

Tunniussineq

§ 15. Inissiat naammassineqareerpata aammalu tiguneqareerpata aammalu aatsaat atuilernissamut akuersissutip, sanaartornermut naatsorsuutit inaarutaasumik arlaannaannulluunniit attuumassuteqanngitsumik uppersarsarneqarsimasut aamma qularnaveeqqusiusaqaarluni taarsigassarsititsinermut uppersarsaatip allaqqaarnerata oqaaseqarfigineqarani nalunaarsorneqarsimasup kiisalu ikuallattoornissamut illuutillu ajoqusernissaanut sillimasiussap takutinneqarneranni kommunalbestyrelsip taarsigassarsiarititai tunniunneqassapput. Aammattaaq piffissakkaartumik pilersaarutaasumillu aserfallatsaaliuinissamut pilersaarut nassiunneqassaaq.

Imm. 2. Kommunalbestyrelsip taarsigassarsiarititai ukiumi aningaasaliissutit kommunalbestyrelsip missingersuutaanni akuerisani ilanngunneqarfianni, siusinnerpaamik tunniunneqassapput.

Kapitali 3

Sanatitsisoq namminersortoq sanatitsisuulluni, piginneqatigiilluni inissiatillit peqatigiiffiannut tunniunneqartussanik inissialianik nutaanik sanaartorneq

Taarsigassarsianut killiliussat il.il.

§ 16. Sanatitsisoq namminersortoq inissianik nutaanik, piginneqatigiilluni inissiatillit peqatigiiffiannut tunniunneqarnissaat siunertaralugu sanasinnaavoq.

§ 17. Kommunalbestyrelsi § 16 malillugu inissialiornissamut taarsigassarsititsisinnaavoq. §§ 3-10 taamaaqataanik atuutissapput.

Taarsigassarsititsinissamik neriorsuut

§ 18. Inissianik sanaartornissamut taarsigassarsitinneqarnissamik neriorsuummik allakkatigut qinnuteqaat kommunalbestyrelsimi suliasanngorlugu nassiunneqassaaq.

Imm. 2. Qinnuteqaammut ilanngunneqassapput:

- 1) Pilersaarusiarnut nassuiaat, inissiat amerlassusaannik inigisallu katillugit annertussusaanik paasissutissartalik.
- 2) Pitsaassutsinik isumannaarinissamut pisussanut pilersaarummut aamma nakkutilliinissamut pilersaarut.
- 3) Sananermi sanaartornermut aningaasartuutit tamakkiisut takussutissiornerat.
- 4) Kommunalbestyrelsimi nunaminertamik tunineqarnissamut neriorsuutaagallartoq.
- 5) Sanatitsisup namminersortup pisortanut akiitsui pillugit akiliisitsiniartarnermut oqartussamit oqaaseqaat.
- 6) Sanatitsisup namminersortup sanaartornermut aningaasartuutinit tamakkiisunit sinneruttut pissarsiarisinnaanerannut uppenarsaat.

§ 19. Qinnuteqaat nassiunneqartoq tunngavigalugu taarsigassarsititsinissamik neriorsuut qinnutigineqartoq tunniunneqarsinnaanersoq kommunalbestyrelsi aalajangiissaaq.

Imm. 2. Taarsigassarsiarititassat akuersissutigineqarnissaannut piumasarineqarpog:

- 1) Sanasussanut akigitinneqartussat pillugit pisussaaffiliisumik isumaqatigiissuteqartoqarsimannginnissaa, aammalu sanaartugassat aallartinneqarsimannginnissaat.
- 2) Sanaartukkami piffissami sanaartorfusumi sanaartornermut pilersaarusiornermullu inatsisit atuuttut naammassineqarsimanissaat.

Imm. 3. Digitalimik sanaartornermut suliasamik aqutsinermik atuinissaq pillugu maleruagassanik Naalaakkersuisut aalajangersaasinnaapput.

§ 20. Kommunalbestyrelsip qinnuteqaat akuerippagu, kommunalbestyrelsi taarsigassarsititsinissamik neriorsuummik tunniussissaaq, tassanilu taarsigassarsiarititassat amerlassuserigallagassaat taarsigassarsititsinermullu atugassarititaasut allassimassapput.

Imm. 2. Taarsigassarsiarititassat inaarutaasumik annertussusissaat, sanaartornermut naatsorsuutit suliamut attuumassuteqanngitsumit akuerisat tunngavigalugit naatsorsorneqassapput.

Imm. 3. Sanaartornermut aningaasartuutissanut missingersuusiat, taarsigassarsiat akueri-neqarnerannut tunngaviusimasut allannguuteqarpata, aammalu allannguutit taarsigassarsiat inaarutaasumik annertussusissaannut sunnuteqartussanngorpata, piginneqatigiilluni inissi-aatillit peqatigiiffiata tunngavissaqanngitsumik kinguaasaanartaqanngitsumik tamanna kommunalbestyrelsimut nalunaarutigissavaa. Tamanna pinngippat taarsigassarsiat inaarutaasut neriorsuutigineqartunit annertunerulersinneqarsinnaanngillat.

§ 21. Kommunalbestyrelsi qinnuteqartumut kr. 100.000 sinnerlugit pisortanut akilerneqanngitsunik akiitsoqartumut, taarsigassarsititsinissamut neriorsuummik tunniussisinnaanngilaq.

§ 22. Sanaartorneq kommunalbestyrelsimi taarsigassarsititsinissamik neriorsuutitut allakkiap suliarineqarnerani ulluliussamiit ukiut marluk qaangiutsinnagit aallartinneqarsimassaaq, aammalu ukiut pingasut qaangiutsinnagit naammassineqarsimassalluni atorineqalersimassallunilu. Tamanna pinngippat neriorsuut siumut ilisimatitsinertaqanngitsumik atorunnaarsinneqassaaq.

Imm. 2. Piginneqatigiilluni inissiaatillit peqatigiiffiat taarsigassarsititsinissamik neriorsuutitut allakkiap suliarineqarnerani ulluliussamiit ukiut marluk qaangiutsinnagit sanaartorneq aallartinneqareersimanersooq aallartinneqareersimannginnorsorluunniit pillugu paasissutissanik kommunalbestyrelsimut nassiussissaaq. Sanaartorneq aallartinneqareersimappat tamanna pillugu nalunaarut, piginneqatigiilluni inissiaatillit peqatigiiffiata suliarisimasaa, aammalu kommunimi teknikkimut ingerlatsivimmit sumiiffimmiittumit uppersarnerqarsimasooq ilanngunneqassaaq.

Imm. 3. Kommunalebestyrelsi sanaartornerup kinguaattoornerani, piffissamut killiliussat imm. 1-imi allassimasut saneqqunneqarnissaannik akuersisinnaavoq.

Imm. 4. Piginneqatigiilluni inissiaatillit peqatigiiffiata taarsigassarsititsinissamik neriorsuutitut allakkiap suliarineqarnerani ulluliussamiit ukiut pingasut qaangiutsinnagit kommunalbestyrelsimut atuilernissamut akuersissutip assilinera nassiutissavaa.

Taarsigassarsititsinissamut neriorsuutip aamma inissiat tunniunneqarnerat

§ 23. Sanatitsisup namminersortup kingusinnerpaamik atuilernissamut akuersissutip tunniunneqarnerani inissiat piginneqatigiilluni inissiaatillit peqatigiiffiannut, pisinermut akiumumik, sanatitsisumit aalajangerneqarsimasumik tamakkiisumik akilersillugit tunniutissavai. Taamaattoqanngippat, tamatumani kommunalbestyrelsi allamik aalajangiisimanngippat, taarsigassarsititsinissamik neriorsuut atorunnaassaaq.

Imm. 2. Pisinermut akiumumut tamakkiisumut pisinermut atatillugu aningaasartuutit tamakkiisut ilanngunneqassapput.

§ 24. Inissiat sanatitsisumit namminersortumit sananeqartut piginneqatigiilluni inissiaatillit peqatigiiffianni ilaasortanit amerlaneruppata, sanatitsisup kommunalbestyrelsi piginneqataassutissani inuttaqanngitsuni piginneqataalernissamik neqeroorfigissavaa. Kommunalebestyrelsi piginneqataalinngippat, sanatitsisooq piginneqataassutissanik inuttaqanngitsunik piginneqataalissaaq.

Imm. 2. Piginneqatigiilluni inissiaatillit peqatigiiffiata ineqarnermut akitsuut, inissiamut atuisinnaatitaaffiusumut aalajangerneqartoq sanatitsisumut imaluunniit kommunalbestyrelsimut, piginneqataalersumut akilersissavaa.

§ 25. Sanatitsisup Inatsisartut inatsisaanni matumani maleruagassat malillugit inissiat § 24, imm. 1, uniffiup aappaa naapertorlugu tiguneqarsimasut, allamut attartortissinnaavai.

Imm. 2. Allamut attartortitsineq taamaallaat atugassarititaasut piffissamut killiligaasut tunngavigalugit aammalu qaammatit 12-kkaarlugit pisinnaavoq, qaammatit 6-ikkaarlugit sivitsuisarnissaaq periarfissaqarluni. §§ 63-65 taamaaqataanik atuutissapput.

Imm. 3. Sanatitsisooq, piginneqataassutiminik inunnut, piginneqatigiilluni inissiaatillit peqatigiiffiata akuersineratigut piginneqatigiilluni inissiaatillit peqatigiiffianni ilaasortanngorsinnaasunut tunniussiniassalluni, pisussaaffeqarpoq.

Imm. 4. Attartortoq inigisani qimallugu nuuppat, sanatitsisooq tamanna pillugu piginneqatigiilluni inissiaatillit peqatigiiffiannut nalunaarutiginnissaaq.

Imm. 5. Piginneqataassutit atuisinnaatitaaffiusut, Inatsisartut inatsisaannut matumunnga aamma piginneqatigiilluni inissiaatillit peqatigiiffiata malittarisassaannut naapertuuttumik, piginneqatigiilluni

inissiaatillit peqatigiiffiat aqqutigalugu, tuniniarneqassapput. Piginneqatigiilluni inissiaatillit peqatigiiffiat piginneqataassutigin tiguisussanik inunnik innersuussinngippat, piginneqataassut tunineqartussatut tamanut ammasumik nalunaarutigineqassaaq.

Imm. 6. Sanatitsisup piginneqatigiilluni inissiamik allamut attartortitsinera, piginneqatigiilluni inissiamik piginneqataasup allamut attartortitsineranut sanilliunneqassaaq.

§ 26. Kommunalbestyrelsip inissiat § 24, imm. 1. uniffik siullesq naapertorlugu tiguneqarsimasut, inissianik attartortitsisarneq pillugu inatsimmi namminersortut attartortitsisarnert pillugu maleruagassat sukkulluunniit atuuttut malillugit, attartortissinnaavai. Attartornermut akiliut, annerpaamik piginneqatigiilluni inissiaatillit peqatigiiffiannut ineqarnermut akitsuut 15 %-imik ilassuserlugu, annertussuseqarsinnaavoq.

Imm. 2. Kommunalbestyrelsi piginneqataassutimi, inunnut piginneqatigiilluni inissiaatillit peqatigiiffiata akuersissuteqarneratigut, piginneqatigiilluni inissiaatillit peqatigiiffianni ilaasortanngorsinnaasunut, tunniunniarnissaannut pisussaaffeqarpoq.

Imm. 3. Attartortup inigisani qimallugu nuuppat, kommunalbestyrelsip piginneqatigiilluni inissiaatillit peqatigiiffiat tamanna pillugu nalunaarfigissavaa.

Imm. 4. Piginneqataassut atuisinnaatitaaffusoq, Inatsisartut inatsisaannut matumunnga aamma piginneqatigiilluni inissiaatillit peqatigiiffiata malittarisassaannut naapertuuttumik, piginneqatigiilluni inissiaatillit peqatigiiffiat aqqutigalugu, tuniniarneqassaaq. Piginneqatigiilluni inissiaatillit peqatigiiffiat piginneqataassumik tiguisussamik inummik innersuussinngippat, piginneqataassut tunineqartussatut tamanut ammasumik nalunaarutigineqassaaq.

Imm. 5. Kommunalbestyrelsi piginneqataasutut, attartortup piffissami attartorfiusumi iliuuseqarnerinut, iliuuseqannginnerinut aamma aalajangiinerinut allanut, piginneqatigiilluni inissiaatillit peqatigiiffiannut tunngatillugu, akisussaasuvoq. Attartortoq § 65 malillugu taassuma pisinnaatitaaffini killiliinerit pillugit allakkatigut ilisimatinneqassaaq.

Imm. 6. Piginneqatigiilluni inissiaatillit peqatigiiffiata malittarisassaanni aalajangersakkat, attartortumut toqqaannartumik pisussaaffiliipput.

§ 27. Kommunalbestyrelsip sanatitsisumut namminersortumut taarsigassarsititsinissamik neriorsuutaa, inissiat ilanngullugit piginneqatigiilluni inissiaatillit peqatigiiffiannut tunniunneqassaaq.

Imm. 2. Pisinnermut akigititaasup inissiamut piginneqataasup atuisinnaatitaaffigisaanut naligitinneqartup naleqqussakkap 5%-iinik piginneqataasut ataasiakkaat aallarniutissanut nammineerlutik akiliuteqarpata, taarsigassarsiarititassat aatsaat tunniunneqarsinnaapput.

Imm. 3. Aningaasartuutissanit tamakkiisunit sinneruttut, piginneqatigiilluni inissiaatillit peqatigiiffiata nammineerluni aningaasalersussavai.

§ 28. Inissiat tunniunneqarnerinut nalunaarut kommunalbestyrelsimut nassiunneqassaaq.

Imm. 2. Nalunaarummut ilanngunneqassapput:

- 1) Pilersitsinnermut isumaqatigiissut, pilersitsisunit tamanit atsiorneqarsimasooq.
- 2) Piginneqatigiilluni inissiaatillit malittarisassaarut.
- 3) Pisinnermut uppersarsaat atsiorneqarsimasooq nunaminertamik atugassiineq aamma atuilernissamut akuersissut tassunga atasooq.

- 4) Sanatitsisup pitsaassutsimik isumannaarineranut aamma inissiat sananeqarnerisa nalaanni nakkutilliineranut uppersaasat.
- 5) Sanatitsisup inissianik piffissakkaartumik pilersaarutaasumillu aserfallatsaaliuinissamut pilersaarutaa.
- 6) Piginneqataasut aamma piginneqatigiilluni inissiatillit peqatigiiffiata namminneerlutik aningaasalersuutissaminnik pissarsisinnaanerannut uppersaasat.

Tunniussineq

§ 29. Inissiat naammassereerpata aammalu piginneqatigiilluni inissiatillit peqatigiiffiannit tiguneqareerpata aammalu uppersaasatit § 28, imm. 2-imi allassimasut kiisalu qularnaveeqqusiussaqluni taarsigassarsititsinermut uppersaasatip allaqqaarnera oqaaseqarfigineqanngitsumik nalunaarsorsimasoq naqissuserneqarsimasorlu kiisalu ikuallattoornissamut aamma illuutit ajoqusernissaanut sillimmasiissut saqqummiunneqarpata, kommunalbestyrelsip taarsigassarsiarititai tunniunneqassapput.

Imm. 2. Taamaattoq kommunalbestyrelsip taarsigassarsiarititai siusinnerpaamik ukiumi aningaasaliissutit missingersuutini kommunalbestyrelsimit akuerineqartuni ilanngunneqarfianni, tunniunneqassapput.

Imm. 3. Taarsigassarsiarititat piginneqatigiilluni inissiatillit peqatigiiffiata illuutaa qularnaveeqqusiullugu qularnaveeqquserneqassapput. Qularnaveeqqusiussaqluni taarsigassarsititsinermut uppersaasat, taarsigassarsiat illuut qularnaveeqqusiullugu pisinermi akigititap tamarmiusup ilaata sinneruttup aningaasalersornissaanut tunniunneqarsimasut, akilerneqareerpata akilerneqartussatut inissinneqassaaq.

Kapitali 4

Kommunit inissiaataasa attartortittakkat piginneqatigiilluni inissiatut tiguneqarnissaannut taarsigassarsititsineq

§ 30. Kommunilbestyrelsi, piginneqatigiilluni inissiatillit peqatigiiffiata kommunip inissiaataannik attartortittakkanik tigusinissaanut aningaasartuutit tamarmiusut ilaannakortumik aningaasalersorneqarnerannut, taarsigassarsititsisinnaavoq. §§ 3-10 taamaaqataannik atuupput.

§ 31. Kommunip illuutaanni attartortittakkanik inissiaartaqartumi attartortut inissianik attartukkaminnik piginneqatigiilluni inissiatut tigusinissamik kommunilbestyrelsimut qinnuteqarsinnaapput.

Imm. 2. Illuummi attartortittakkanik inissiaartaqartumi attartortut, inissianik attartukkaminnik piginneqatigiilluni inissiatitut tigusinissamik kissaateqartut, illuummi attartortittakkanik inissiaartaqartumi tamarmiusumi attartortut tamakkiisut 75%-erissavaat. Inissiami ataatsimi attartortoq ataasiinnartut naatsorsorneqartarpoq, attartornermut isumaqatigiisummi allassimasut amerlassusaat apeqqutaatinngu.

Imm. 3. Illuummi attartortittakkanik inissiaartaqartumi attartortut tamarmik piginneqatigiilluni inissiatillit peqatigiiffiannit piginneqatigiilluni inissiatillit peqatigiiffiannut ilaasortanngornissamik allakkatigut neqeroorfigineqassapput.

§ 32. Kommunip illuutaat attartortittakkanik arlalinnik inissiaartaqartoq tamakkerlugu taamaallaat tiguneqarsinnaavoq, taamaallunilu piginneqatigiilluni inissiatillit peqatigiiffiat illuut attartortittagaq inissiaartaqartoq tamakkerlugu piginnittussaataitalissalluni.

§ 33. Attartortut kommunip illuutaannik attartortittakkanik inissartaqartunik piginneqatigiilluni inissianngortitsinissamik qinnuteqaataat, kommunalbestyrelsimut nassiunneqassaaq. Pilersitsinermi isumaqatigiissut, pilersitsisunit tamanit atsiorneqarsimasooq aammalu piginneqatigiilluni inissiaatillit peqatigiiffiata malittarisassai, qinnuteqaammut ilanngunneqassapput.

§ 34. § 33 naapertorlugu qinnuteqaat akuerineqarpat kommunalbestyrelsi piginneqatigiilluni inissiaatillit peqatigiiffiannut pisinissamut neqeroorummik aamma kommunip inissiaataasa attartortittakkat nassuiaataannik, pisinermi akigititanik allanillu atugassarititaasunik, nassiussissaaq.

Imm. 2. Pisinissamut neqeroorut illuummi attartortittakkanik inissartaqartumi qularnaveeqqusiissutitut nalunaarsorsimasunut pisinnaatitaaffusinnaasut piginnittumullu immikkut piumasaqaataasimasinnaasut pillugit paasissutissamik imaqaassaaq. Kommunalestyrelsip piumasarisinnaavaa pisinissamut neqeroorut piginneqatigiilluni inissiaatillit peqatigiiffiata illuut attartortittakkanik inissartaqartoq qularnaveeqqusiullugu taarsigassarsianik pioreersunik kommunalbestyrelsimut taarsigassarsiaritinneqartunik, sapinngisamik annertunerpaanik tigusinissaanut atugassarititaasunik imaqaassaaq.

§ 35. Pisinissamut neqeroorummik, takuuk § 34, suliaqarnermut atugassamik kommunalbestyrelsip illuut attartortittagaq illutaanni misissussavaa aammalu teknikkikkut-aningaasaqarnikkut nalilersuineramik suliaqaassalluni. Piginneqatigiilluni inissiaatillit peqatigiiffiat illuliortiternermut ilisimasalimmik, qanoq issutsimut nalunaarusiamik suliaqartussamik, siunnersortissarsiusaaq.

Imm. 2. Teknikkikkut-aningaasaqarnikkut nalilersuineq aamma qanoq issutsimut nalunaarusiaq ataatsimoorlutik kommunalbestyrelsip pisinissamut neqeroorutaanut tunngavissaliissapput.

Imm. 3. Naalakkersuisut teknikkikkut-aningaasaqarnikkut nalilersuineq pillugu aalajangersagaliorsinnaapput.

§ 36. Sanaartornermik ilisimasalik, tak. § 35, imm. 1 sanaartornermi nakkutilliineramik aamma sanaartornermi pilersaarusiornermik misilittagaqaassaaq, aammalu illuummut immikkut ittumik attuumassuteqartussaananik. Sanaartornermik ilisimasalik inuussutissarsiornermi akisussaanermut sillimmasersimassaaq.

Imm. 2. Piginneqatigiilluni inissiaatillit peqatigiiffiat aningaasalersuinermi siunnersortimik, illuutip attartortittakkanik inissartaqartup tiguneranut atatillugu piginneqatigiilluni inissiaatillit peqatigiiffiannut ikiuuttussamik atorfinitsitsissaaq.

§ 37. Sanaartornermik ilisimasallip qanoq issutsimut nalunaarusiaanut naapertuuttumik, tak. § 35, imm. 1 kommunip illuutaannut attartortittakkanik inissartaqartumut pisinermut akigititassaaq teknikkikkut aningaasaqarnikkullu nalinganut, tassaasumut illuutip pisiareqqinneranut akigititassaaq nalikilliliinerit aserfallatsaaliorneqanngitsullu ilanngaatilugit, aalajangerneqassaaq. Tassunga tigusinermut atatillugu aningaasartuutitut matussutissatut 2%-it ilanngunneqassapput.

Imm. 2. Illuut tigusinernup nalaani aserfallatsaaliqarsimanngippat, aserfallatsaaliinerup aallarteqqinnissaanut aningaasartuutissanut matussutissamik piginneqatigiilluni inissiaatillit peqatigiiffiat taarsigassarsisinnaavoq. Taarsigassarsiat akilersorneqartussamik tulleriinnilersuinermi

kommunalbestyrelsimut taarsigassarsianit sallinngortillugit inissinneqassapput.

Imm. 3. Najugaqarfimmi ataatsimi illuummi inissianilu ataasiakkaani sillimmatissatut illuartitat ileqqaakkat illuutip attartortitsiviusartup tignerani piginneqatigiilluni inissiatillit peqatigiiffiannut nakkartinneqassanngillat.

§ 38. Illuut attartortittakkanik inissartaqartoq nutaaq naammassineqarnerminiit atorineqalernerminiillu ukiup ataatsip iluani tiguneqassappat, pisinermut akiusooq sanaartornermut naatsorsuutit akuerisat tunngavigalugit aalajangerneqassaaq, akigititassamullu tigusinermut atatillugu aningaasartuutitut matussutissatut 2%-it ilanngunneqassapput.

§ 39. Pissutsit immikkut tamatumunnga tunngavissaqartitsippata illuutip attartortittakkanik inissartaqartup §§ 37 aamma 38 naapertorlugit akigititassatut aalajangersarneqartunit akikin-nerusumik tunineqarsinnaanera Naalakkersuisut aalajangersinnaavaat. Pisinissamut akigititassaq illuutip niuernerminalinganit qaffasinnerulersinneqarsinnaanngilaq.

§ 40. Illuut attartortittakkanik inissartaqartoq innaallagissamik, imermik, kiassarnermik, kuuffeqarfinnik imaluunniit atortorissaarutitik allanik ataatsimoortumik pilersuinermut attaviligaappat, piginneqatigiilluni inissiatillit peqatigiiffiannut illuutip attartortittakkanik inissartaqartup tunniunneqannginnerani, kommunalbestyrelsi pilersuinermik isumaginniffusussamik pilersitsissaaq. Ataatsimoortumik pilersuinermut ilaatinneqarpoq pilersuineq piginneqataasunut ataasiakkaanut immikkut atuinermut uuttuutit tunngavigalugit akiliisitsinnaanngippat.

Imm. 2. Kommunalbestyrelsi atortorissaarutit ataatsimoorussat nassuiassavai agguassallugillu aammalu taakkua pilersuinermik isumaginnittussamut tunniutissallugit. Atortorissaarutit ataatsimoorussat agguarneri sapinngisamik pisortat pilersuinermut aqqusersuutaannut pingaarnernut atassuserlugit, pissaaq. Pilersuinermut isumaginnittussaq pilersuisussanut ataasiakkaanut isumaqateqassaaq.

Imm. 3. Pilersuinermut isumaginnittussamut malittarisassat, atortorissaarutitut ataatsimoorussanut nassuiaatitaqartut agguaanertaqartullu aammalu illuutit attavilerneqartut ilaasortaanissamut pisussaaffigisaat, piginneqatigiilluni inissiatillit peqatigiiffiannut tunniussisoqarsinnaanngoqqullugu illuummut attartortittakkanik inissartaqartumut pisussaaffiliisumik nalunaarsorneqassapput.

Imm. 4. Pilersuinermut isumaginnittussaq, pilersuisunut ataasiakkaanut isumaqatigiissuteqassaaq. Pilersuinermut isumaginnittussaq illuutini ataasiakkaani piginnittunut, pilersuinermut isumaginnittussap atortorissaarutaannut ataatsimoorussanut attaviligaasunut, akiliutissamik akiliisitsissaaq.

Imm. 5. Pilersuinermut isumaginnittumut iluaqutaasussanngorlugit qularnaveeqqut piginneqatigiilluni inissiatillit peqatigiiffianni inissiamut ataatsimut 50.000 koruuninut nalunaarsortinneqassaaq.

§ 41. Kommunalbestyrelsi tigusinermut atatillugu aningaasartuutit akilissavaat, takukkit §§ 37-38.

§ 42. Attartortoq, inigisaminik attartortittakkamik piginneqatigiilluni inissiatut tigusinissamik kissaateqanngitsoq, takuuk § 31, imm. 3:

1) Inigisamini attartortittakkami najugaqaannarsinnaavoq.

2) Illoqarfimmi tassani, inissianik attartortitsisarneq pillugu inatsisit sukkulluunniit atuuttut tamatumunnga periarfissaqartitsippata, inissiamik attartortittakkamik allamik neqeroorfigineqarnissamik

kommunalbestyrelsi qinnuigisinnaavaa.

Imm. 2. Kommunalbestyrelsi piginneqatigiilluni inissiatillit peqatigiiffianni piginneqataasutut inississaaq, inissianut attartortunit, inigisaminnik attartortittakkamik piginneqatigiilluni inissiatut tigusinissamut kissaateqanngitsunit, najorneqartunut, atuisinnaatitaassalluni. Kommunalbestyrelsi piginneqatigiilluni inissiaateqartutut attartortup iliuusaanut, iliuuseqarfiginngisaanut suliaanullu allanut attartorneqarnerani piginneqatigiilluni inissiatillit peqatigiiffianut akisussaasuvoq. Attartortoq allakkatigut ilisimatinneqassaaq § 65 naapertorlugit pisinnaatitaaffianik annikinnerusumik periarfissaqarnera. Piginneqatigiilluni inissiatillit peqatigiiffiata kommunalbestyrelsi inissianut atuisinnaatitaaffigiligaannut ineqarnermut akitsuummik akiliisittassavaa.

Imm. 3. Attartortumut illuummiiginnartumut ineqarnermut akiliut, inissianik attartortitsisarneq pillugu inatsimmi sukkulluunniit atuuttumi kommunip inissiaataannut attartortittakkanut ineqarnermut akiliutip naatsorsorneqartarneranut maleruagassat nalinginnaasut malillugit, aalajangersarneqassaaq.

Imm. 4. Piginneqatigiilluni inissiatillit peqatigiiffiata malittarisassaanni aalajangersakkat, attartortumut illuummi attartortuuginnartumut, pisussaaffiliipput.

§ 43. Attartortoq inigisaminik attartortittakkamik piginneqatigiilluni inissiamik tigusinissamik kissaateqanngitsaq, aammalu illuummi attartortuuginnartoq, piffissami sukkulluunniit inigisani attartortittagaq piginneqatigiilluni inissiatut tigusinnaavaa. Piginneqatigiilluni inissiatillit peqatigiiffiat piginneqatigiissutip tunniunneqarneranut akerliusinnaanngilaq.

§ 44. Inissiamik allamik attartornissamik neqeroorut attartortup akuerippagu, kommunalbestyrelsi inissiamut attartortup inoqutaasa amerlassusaannut naapertuuttumut, attartortoq neqeroorfissavaa. Kommunalbestyrelsip, attartortup nuunnermut aningaasartuutai naleqquttut, akilissavai.

Imm. 2. Attartortoq inigisani qimallugu nuuppat, kommunalbestyrelsip tamanna pillugu piginneqatigiilluni inissiatillit peqatigiiffiat nalunaarfigissavaa. Piginneqataassut atuisinnaatitaaffittaartoq, Inatsisartut inatsisaannut matumunnga aamma piginneqatigiilluni inissiatillit peqatigiiffiata malittarisassaannut naapertuuttumik, piginneqatigiilluni inissiatillit peqatigiiffiat aqqutigalugu tunineqassaaq.

Imm. 3. Piginneqatigiilluni inissiatillit peqatigiiffiata piginneqataassut pisisussamut piginneqatigiilluni inissiatillit peqatigiiffiannit akuerineqarsinnaasumut aammalu Inatsisartut inatsisaanni matumani aamma peqatigiiffup malittarisassaanni akuerisaasumik, pitsaanerpaamik anguneqarsinnaasumik akeqartillugu, tuniniarsarissavaa. Piginneqatigiilluni inissiatillit peqatigiiffiata piginneqataassut, pissutissaqanngitsumik kinguarsaanani, tuniniassavaa.

§ 45. Kommunalbestyrelsip piginneqatigiilluni inissiatillit peqatigiiffiata illuummik attartortittakkanik inissiaartaqartumik tigusinieranut atatillugu, atugassarititaasut sukumiinerusumik isumaqatigiissutaareersut tunngavigalugit piginneqatigiilluni inissiatillit peqatigiiffiannit ininik attartornissamut pisinnaatitaaffeqarnissani piumasarinnaavaat. Taamatuttaaq tigusinermi attartortut allalluunniit illuummut tunngatillugu atuisinnaatitaasut, tassunga ilaallutik inuussutissarsiutinik ingerlatsinissamik pisinnaatitaaffeqartut, tigusinermi pisinnaatitaaffeqarnerisa atuutiinnarnissaat piumasarineqarsinnaavoq.

§ 46. Piginneqatigiilluni inissiatillit peqatigiiffiannut tunniussinissaq siunertaralugu, kommunalbestyrelsi nutaanik inissialiorsinnaavoq, ilanngullugu piginneqatigiilluni inissiatillit peqatigiiffiat kommunalbestyrelsi kisimiilluni piginneqataasuulluni.

Imm. 2. Kommunalbestyrelsi, inissianik nutaanik kommunalbestyrelsimit pisinissamut, piginneqatigiilluni inissiatillit peqatigiiffiannut taarsigassarsititsisinnaavoq. §§ 3-10 taamaaqataanik atuutissapput.

§ 47. Piginneqatigiilluni inissiatillit peqatigiiffiata, kommunalbestyrelsi kapitali manna malillugu piginneqataalersoq, ineqarnermut akitsuummik, inissiamut atuisinnaatitaaffigineqartumut aalajangersagaasumik, akiliisissavaa.

§ 48. Kommunalbestyrelsip inissiat kapitali manna malillugu sanaartorneqartut, inissianik attartortitsisarneq pillugu inatsimmi namminersortut attartortitsisarnerat pillugu maleruagassat sukkulluunniit atuuttut malillugit, attartortissinnaavai. Attartornermut akiliut, annerpaamik piginneqatigiilluni inissiatillit peqatigiiffiannut ineqarnermut akitsuut 15 %-imik ilassuserlugu, annertussuseqarsinnaavoq.

Imm. 2. Kommunalbestyrelsi piginneqataassutimi, inunnut piginneqatigiilluni inissiatillit peqatigiiffiata akuersissuteqarneratigut, piginneqatigiilluni inissiatillit peqatigiiffianni ilaasortanngorsinnaasunut, tunniunniarnissaannut pisussaaffeqarpoq.

Imm. 3. Attartortup inigisani qimallugu nuuppat, kommunalbestyrelsip piginneqatigiilluni inissiatillit peqatigiiffiat tamanna pillugu nalunaarfigissavaa.

Imm. 4. Piginneqataassut atuisinnaatitaaffusoq, Inatsisartut inatsisaannut matumunnga aamma piginneqatigiilluni inissiatillit peqatigiiffiata malittarisassaannut naapertuuttumik, piginneqatigiilluni inissiatillit peqatigiiffiat aqqutigalugu, tuniniarneqassaaq. Piginneqatigiilluni inissiatillit peqatigiiffiat piginneqataassummik tiguisussamik inummik innersuussinngippat, piginneqataassut tunineqartussatut tamanut ammasumik nalunaarutigineqassaaq.

Imm. 5. Kommunalbestyrelsi piginneqataasutut, attartortup piffissami attartorfiusumi iliuuseqarnerinut, iliuuseqannginnerinut aamma aalajangiinerinut allanut, piginneqatigiilluni inissiatillit peqatigiiffiannut tunngatillugu, akisussaasuvoq. Attartortoq § 65 malillugu taassuma pisinnaatitaaffini killiliinerit pillugit allakkatigut ilisimatinneqassaaq.

Imm. 6. Piginneqatigiilluni inissiatillit peqatigiiffiata malittarisassaanni aalajangersakkat, attartortumut toqqaannartumik pisussaaffiliipput.

Kapitali 6

Piginneqatigiilluni inissiatillit peqatigiiffiat

§ 49. Piginneqatigiilluni inissiatillit peqatigiiffiannut ilaasortaq ataaseq piginneqatigiilluni inissiamut ataasiinnarmut atuisinnaatitaalersinnaavoq.

Imm. 2. Piginneqataassut ataaseq inummit ataasiinnarmut pigineqarsinnaavoq.

Imm. 3. Inuinnaat aamma inuit namminersorsinnaatitaasut kisimik piginneqatigiilluni inissiatillit peqatigiiffiannut ilaasortaasinnaapput.

Imm. 4. Kommuni, imaluunniit sanatitsisoq namminersortoq piginneqatigiilluni inissiaatillit peqatigiiffianni piginneqataasutut inississimappata, imm. 1 aamma 3 atuutissanngillat.

§ 50. Piginneqatigiilluni inissiaatillit peqatigiiffianni siulersuisut piginneqataassutitut tamaginnut allattuiffeqartitsissapput aamma piginnittoq, ulloq ilaasortaalerfik, inissiamut atuisinnaatitaaffik aamma ilanngaaseereerluni tunisinermi iluanaarutit ingerlaarneri ilanngullugit.

Imm. 2. Siulersuisut piginneqataasup qinnuiginninneratigut, piginneqataassummut aalajangersimasumut allattukkat pappialanngortinnerat uppersarsagaasoq, nassiuutissavaa.

Imm. 3. Naalakkersuisut piginneqataassutsitut allattuiffeqarneq pillugu aalajangersagaliorsinnaapput.

§ 51. Piginneqataasut piginneqataassutsit aggorlugit annertussusilerneqarnerat naapertorlugu piginneqatigiilluni inissiaatillit peqatigiiffiata pisuussutaanut piginneqataapput, taannalu piginneqatigiilluni inissiaatillit peqatigiiffianni inigisap angissusaanut tamakkiisumut naleqqiullugu inissiani piginneqataaffiusuni ataasiakkaani inigisap angissusaa naapertorlugu naatsorsorneqartarpoq.

Imm. 2. Kingusinnerpaamik atuilernermi ataatsimeersuartut piginneqataassutsitut naligitinneqartut naleqqussarsinnaavaat.

§ 52. Piginneqataasut pisussaaffinnut piginneqatigiilluni inissiaatillit peqatigiiffiannut tungassuteqartunut, taamaallaat aningaasanngorlugu aallarniutissatut akiliutiminik, akiliisussaavoq.

Imm. 2. Piginneqataasut imaluunniit taassuma pigisai, piginneqataasup nutaap piginneqatigiilluni inissiamik tigusinissaata tungaanut, imm. 1 malillugu akiliisussaavoq.

Imm. 3. Piginneqataasut piginneqatigiilluni inissiaatillit peqatigiiffiata pisuussutaanit piginneqataassutaat qularnaveeqqusiissutaasinnaanatilugu eqqartuussisutigoortitsissutigineqarsinnaanngillat.

Imm. 4. Piginneqataasut taamaallaat tunisinermi ilanngaattissat peereerlugit iluanaarutigisinnaasaminik tigusinnaatitaasussamik piginnaatitsisinnaavoq. Tigusinnaatitaasup piginneqataassutip tunineqarnissaa piumasarinnaanngilaa. Tunisinermi iluanaarutaajunnartut kisimik eqqartuussivikkut suliaasanngortinneqarsinnaapput. Akiitsoqarfigineqartup piginneqatigiilluni inissiap tunineqarnissaa siunertaralugu eqqartuussivikkut suliaakkiissutigisinnaanngilaa.

§ 53. Piginneqatigiilluni inissiaatillit peqatigiiffianni oqartussaasuni qullersaasut tassaapput ataatsimeersuartut. Ataatsimeersuarnermi piginneqataasut 1 piginneqataasumut taasisinnaatitaassutaassaaq. Ataatsimeersuarnermi taasisinnaatitaasut tassaavoq piginneqataasut allattuiffianni ateq allassimasooq.

Imm. 2. Ataatsimeersuarnermi piginneqataasut tamarmik immikkut ataatsimik taasisinnaatitaapput. Inatsisartut inatsisaanni matumani, piginneqatigiilluni inissiaatillit peqatigiiffianni malittarisassat imaluunniit peqatigiiffeqarnermut inatsisini maleruagassani nalinginnaasuni allanik aalajangiisoqarsimanngippat, ataatsimeersuarnermi aalajangiinerit nalinginnaasumik taasisut amerlanerussuteqarnerisigut akuersissutigineqartarput.

Imm. 3. Ukiumoortumik ineqarnermut akitsuut, pigineqataasunut ataasiakkaanut akilersinneqartussaq ataatsimeersuarnermi aalajangersarneqartarpoq.

Imm. 4. Naalakkersuisut malittarisassat nalinginnaasut pisussaaffiliisut pillugit maleruagassanik aalajangersaasinnaapput.

§ 54. Ataatsimeersuartut siulersuisunik immaqalu aqutsisumik, ulluinnarni aqutsinermik isumaginnittuusussanik qinersissapput. Ataatsimeersuarnermi aqutsisumik toqqaasoqanngippat, siulersuisut piginneqatigiilluni inissiatillit peqatigiiffiata ulluinnarni aqunneqarnerannik isumaginnittuusapput. Peqatigiiffimmi ilaasortat kisimik siulersuisunut qinigaasinnaassuseqarput.

Imm. 2. Piginneqatigiilluni inissiatillit peqatigiiffiata ulluinnarni aqunneqarnera siulersuisunit isumagineqarpat, piginneqatigiilluni inissiatillit siulersuisunut ilaasortat piginneqatigiilluni inissiatillit peqatigiiffiannut aningaasaqarnikkut akisussaaffinut isumannaallisaatitut siulersuisut akisussaanerinut sillimmasiissapput.

§ 55. Piginneqatigiilluni inissiaq najugaqarfissatut siunnerfeqartinneqartoq, inuussutissarsiornermut atorneqassanngilaq, taamaattorli takukkit imm. 2, aamma § 45.

Imm. 2. Inuussutissarsiutinik ingerlataqarneq illup sullitanit ornigarneqarneranik kinguneqassanngippat, tamannalu najugaqarfittut atuinnermut naleqqiullugu annertuallaassanngippat, ataatsimeersuartut piginneqatigiilluni inissiap ilaata inuussutissarsiornermut atorneqarsinnaanera akuerisinnaavaat.

Kapitali 7

Sillimmasiisarneq, aserfallatsaaliuineq allanngortitsisarnerlu

§ 56. Piginneqatigiilluni inissiatillit peqatigiiffiata illuutaa sukkulluunniit ikuallattoornissamut illutaatalu ajoqusernissaanut sillimmaserneqarsimassaaq.

§ 57. Piginneqatigiilluni inissiatillit peqatigiiffiata illuutaa inissiallu ataasiakkaat naammaginnartumik aserfallatsaaliuineqassapput. Aserfallatsaaliuineq sanasut suliaattut pitsaassuseqarlutik eqqortumik aammalu sanaartornermi pilersaarusiormilulu inatsisinut atuuttunut naapertuuttumik suliarineqassapput.

Imm. 2. Piginneqataasut ataasiakkaat piginneqatigiilluni inissiat iluanni aserfallatsaaliuinnermut nutarterinnermullu aningaasartuutitut akisussaasuupput akiliisussaallutillu.

Imm. 3. Piginneqatigiilluni inissiatillit peqatigiiffiat illuummut aamma piginneqatigiilluni inissiani ataasiakkaani aserfallatsaaliuinerit nutarterinerillu sinneritut aningaasartuutitut akisussaasuuvog akiliisussaallunilu.

Imm. 4. Ataatsimeersuartut illup iluani silataanilu aserfallatsaaliuinissamut maleruagassanik, piginneqataasut ataasiakkaat ataqqissallugit naammassissallugillu pisussaaffigisaannik akuersisinnaapput.

Imm. 5. Siulersuisut pilersaarutaasumik ataavartumillu aserfallatsaaliuinissamut pilersaarusiussapput, aammalu piginneqataasut ataasiakkaat ineqarnermut akitsuut aqutigalugu pilersaarutaasumik ingerlaavartumillu aserfallatsaaliuinissamut akiliisinneqassapput.

§ 58. Piginneqataasup illup iluani aserfallatsaaliuisussaataitanini sumiginnarpagu, siulersuisut piginneqataasog allakkatigut piffissap naleqquttup, sukumiinerusumik aalajangerneqartup iluani aserfallatsaaliuinissamik peqqussavaat. Piffissaliussap naanerata kingorna siulersuisut aserfallatsaaliuinissaq suliarineqarsimanersoq paasiniallugu inissiaq takuniassallugu pisinnaatitaapput.

§ 59. Piginneqataasooq inissiap iluani nalinginnaasunik annikinnerusunillu allannguissamut pisinnaatitaaffeqarpoq. Inissiap iluani annertuunik allannguisoqassappat, tamanna siulersuisunit akuerineqassaaq.

Imm. 2. Piginneqataasooq pisinnaatitaanngilaq illup silataani annertuunik allannguissamut, tamanna ataatsimeersuartunit siumoortumik allakkatigut akuerineqarsimanngippat.

Imm. 3. Allannguinerit sanasut suliaattut pitsaassuseqarlutik aammalu sanaartornermut pilersaarusiornermullu inatsisit naapertorlugit suliarineqassapput.

§ 60. Kommunalbestyrelsip piginneqatigiilluni inissiaatillit peqatigiiffiannut pitsanngorsaanernut taarsigassarsiarititanut imaluunniit piginneqatigiilluni inissiaatillit peqatigiiffiata illuutaata allanngortiternissaanut taarsigassarsiarititanut tunngatillugu akilerneqartussat tulleriinnerini nikisitsinissaa akuerisinnaavaa. Kommunalbestyrelsip akilerneqartussat tulleriinnerini nikisitsinissamik akuersinissaanut, tamatuma kingornaniittut qularnaveeqqusiussaqluni taarsigassarsiat akilerneqartussat taamaaqataanik akilerneqartussat tulleriinnerini nikisitsinissamik akuerineqarnissaat, piumasaqaataavoq.

Imm. 2. Kommunalbestyrelsi piginneqatigiilluni inissiaatillit peqatigiiffiata pilersaarutaasumik piffissakkaartumik aserfallatsaaliuinerup aningaasalersornissaanut imaluunniit aserfallatsaaliuisimannginnerup iluarsineqarnissaanut taarsigassarsiaannut tunngatillugu, akilerneqartussat tulleriinnerini nikisitsinissamik akuersisinnaanngilaq.

Imm. 3. Allanngortitsineri piffissaa akilersuiffissaa sivitsorneqarsimanngippat imaluunniit taarsigassarsiat pingaarnerit qaffanneqarsimanngippata, peqatigisaanillu piginneqatigiilluni inissiaatillit peqatigiiffiannut taarsigassarsianit iluanaarutit tunniunneqarsimappata, kommunalbestyrelsip qularnaveeqqutaa, qularnaveeqqusiussaqluni taarsigassarsititsineri akiligassat siornaniittut allanngortinneqarnerisa, akilerneqareerneranni akilerneqassapput.

Kapitali 8

Najugaqartussaataitaneq, attartortitsineq aamma inigisamik allamut attartortitsinissamik akuersisarneq

§ 61. Piginneqataasup inissiami atuisinnaatitaaffigisamini najugaqarnissani pisussaaffigaa. Piginneqataasooq imaluunniit inuk, piginneqataasup inoqutaanut ilaasooq, ukiup ataatsip iluani sivikinnerpaamik qaammatini arfinilinni ataannartuni unnuisarpata, najugaqartussaataitaneq naammassineqarsimassaaq.

§ 62. Siulersuisut qinnuteqartoqartillugu, piginneqataasooq peqanngikkallartussaappat, piginneqataasup piginneqatigiilluni inissiamik inigisaminik inunnut namminersorsinnaatitaasunut attartortitsinissaa akuerisinnaavaat. Qaammatinit 3-nit sivikinnerusumik allamut attartortitsisoqarsinnaanngilaq. Piginneqatigiilluni inissiaatillit peqatigiiffiata siulersuisui, piffissap ukiunik 5-inik sivisussusillip iluani piffissamut ataatsimoortumut sivisunerpaamik qaammatinik 12-inik sivisussusilimmik piginneqatigiilluni inissiap allamut attartortinnissaa, akuerisinnaavaat.

Imm. 2. Imm. 1-imi piffissamut killiliineq apeqqutaatinagu, peqanngikkallarnissaa assersuutigalugu napparsimanermik, ilinniagaqarnermik, pinerluuteqarsimasunik inissiisarfmminermik, imaluunniit piginneqataasup nammineerluni imaluunniit inoqutigiinni ilaasup nuutsikkallarneqarsimaneranik

pissuteqarpat, piginneqataasoq inissiap attartortinnissaanik qinnuteqarsinnaavoq. Qaammatinit pingasunit sivikinnerusumik inigisamik allamut attartortitsisoqarsinnaangilaq.

§ 63. Piginneqatigiilluni inissiaatip inummut allamut attartortinneqarnerani, attartortussaq, attartornermut akiliutissap annertussusissaa, inissiallu inummit allamut attartorneqarneranut atugassarititaasut siulersuisunit akuerineqartussaapput. Attartornermut akiliut annerpaamik ineqarnermut akitsuutip annertoqatigissavaa. Pequtit inummut allamut attartortitsinermi isumaqatigiissummut ilaatinneqarpata, attartornermut akiliut annerutinneqarsinnaavoq, taamaattorli akiliut annertunerpaamik ineqarnermut akitsuut 10%-imik ilallugu annertussuseqarsinnaalluni.

Imm. 2. Inigisamik attartortoq ineqarnermut akiliummik piginneqataasumut akiliisassaaq. Allamut attartortitsinermut allaganngorlugu isumaqatigiissutip assilineri, isumaqatigiissuteqareermermi piaartumik siulersuisunut nassiunneqassaaq.

Imm. 3. Inigisamik allamut attartortitsiniarluni isumaqatigiissuteqarnermi, inigisamik attartortinneqartup piginneqatigiilluni inissiaatillit peqatigiiffiannut, piginneqataasumut inummulluunniit allamut allanik isumaqatigiissuteqarnissaa piumasarineqarsinnaangilaq. Taamatut isumaqatigiissuteqartoqarsimappat taakkua atuutissanngillat. Inigisamik allamut attartortitsinissamik isumaqatigiissut atuutiinnassaaq, kisiannili piumasaqaataasut ilanngunneqartut atuutissanatik.

Imm. 4. Inigisamik allamut attartortitsiniarluni isumaqatigiissut inummut ataatsimut tunngasuuvuq. Attartortoq allamut attartortitseqqippat imaluunniit piginneqatigiilluni inissiap attartukkani allamut atortippagu, ilimasaarinertaqanngitsumik allamut attartortitsinissamut isumaqatigiissut atorunnaassaaq aammalu attartortup piginneqatigiilluni inissiaq piaartumik qimallugu nuussaaq. Taamaattoqarpat piginneqataasoq nammineerluni piginneqatigiilluni inissiap najornissaanut pisussaaffeqarpoq.

§ 64. Piginneqataasoq piginneqatigiilluni inissiaatillit peqatigiiffinnut tunngatillugu piffissami allamut attartortitsiviusumi attartortup iliuusaannut, iliuuseqannginnerannut aalajangiinerinullu akisussaasuuvuq.

§ 65. Allamut attartortitsinissamut isumaqatigiissuteqarnermi, attartortup § 63, imm. 3 aamma § 79 malillugit pisinnaatitaaffini killiliinerit, piginneqataasup attartortumut allaganngorlugu nalunaarutigissavai.

Imm. 2. Imm. 1 malillugu paasissutissiisimannginneq, piginneqatigiilluni inissiaatillit peqatigiiffiata susassarinnigilaa.

Kapitali 9

Piginneqataassutininik tunniussineq

§ 66. Piginneqataassutip atuisinnaatitaaffimmik ilaqartup tunineqarnissaa imalluunniit allatut tunniunnissaa pillugu isumaqatigiissuteqarnissamut siulersuisut kisermaassillutik aalajangiisinnaatitaapput. Piginneqataasup piginneqatigiilluni inissiaatillit peqatigiiffiannit aninissamik kissaateqartup, piginneqataasumut nutaamut piginneqataassutini tunniunneqarnissaanik piginneqatigiilluni inissiaatillit peqatigiiffianni siulersuisut qinnuigissavai.

Imm. 2. Piginneqataasoq piginneqataassutimi, tassungalu atatillugu pisinnaatitaaffimmi pisussaaffimmilu

piginneqataalersussamut nutaamut tunniunneqarnissaasa tungaanut piginneqatigiilluni inissiaatillit peqatigiiffianni ilaasortaaginnassaaq.

§ 67. Piginneqataassummik tunniussinermi piginneqataassutip akia ukunannga qaffasinnerussanngilaq:

- 1) Piginneqataasup aallaqqaatissatut akiliutai.
- 2) Piginneqataasup piginneqatigiilluni inissiaatit pigisarilernerannut atatillugu piginneqatigiilluni inissiaatillit peqatigiiffiata taarsigassarsiaanut akiliutigisimasai.
- 3) Piginneqatigiilluni inissiaammi pitsanngorsaatit nalingi.
- 4) Piginneqataasup piginneqatigiilluni inissiaatillit peqatigiiffianni ingerlatsinermi sinneqartoorutitut naatsorsorneqartunit aamma sillimmatissatut illuartitanit atorineqarsimanngitsunit pisassai.
- 5) Piginneqatigiilluni inissiaatip illuutillu aserfallatsaaliorneqannginnerata nalinga ilanngaatilgalugu.

Imm. 2. Imm. 2. Imm. 1, nr. 1-imi aamma 2-mi aningaasartaliunneqartut ukiumoortumik ukiumi naatsorsuiffimmi ulloq siullesq erniap kisitsisitaanut 1,5%-imik ilallugu qaffanneqartarput.

Aallaqqaatissatut akiliutit piffissami piginneqataassutip pisiarineqarfiani qaffanneqartarput, taamaattorli siusinnerpaamik atuilernissamut akuersissutip suliarineqarnerani ulluliunneqartoq aallarnertigalugu.

Akilersuutit piffissamit akilerneqarfissaanit qaffanneqartarput, taamaattorli siusinnerpaamik atuilernissamut akuersissutip suliarineqarnerani ulluliunneqartoq aallarnertigalugu.

Imm. 3. Atuilernissamut akuersissutip suliarineqarnissaata tungaanut, piginneqataassut tunniunneqartoq piginneqataasup aallaqqaatissatut akiliutaata nalinganik akeqartinneqartarpoq.

§ 68. § 67, imm. 1, nr. 3 naapertorlugit pitsannguinerit inissiap nutaamik atorsinnaassuseqalersinneqarneranik imaluunniit atorineqarnerata nalingata qaffasinnerulersinneqarneranik paasineqassapput. Pisoqaassuseq aamma nungullarnerit pissutigalugit nalinga ajorseriaateqarsimappat taakku ilanngaatigineqassapput.

Imm. 2. Pitsannguinerit tunniussinermit akiumut ilaatinneqassappata, tamanna pitsannguinerit naammassineriniit kingusinnerpaamik qaammatit arfinillit qaangiunnerini siulersuisunit allakkatigut akuerineqarsimassaaq.

§ 69. Piginneqataasup toqunerani aappaasoq qimataasoq piginneqataassummik tigusinissamut aamma piginneqataasutut ingerlaannarnissamik pisinnaatitaaffeqarpoq. Katissimallugu aappaasup piginneqataasup toqunera sioqqutitsiarlugu piginneqataasoq illoqatigisimassagaa aammalu inuit nalunaarsorsimaffianni najugaqatigisimassagaa, piumasqaataavoq.

Imm. 2. Taamatuttaaq inuk, sivikinnerpaamik ukiuni marlunni aammalu piginneqataasup toqunngitsiarnerani aammalu inuit nalunaarsorsimaffianniilluni piginneqataasumut inoqutaasoq, pisinnaatitaaffeqarpoq.

§ 70. Piginneqataasoq illumut paaqqinnittarfimmut assigisaanulluunniit nuuppat, § 69imi aalajangersakkat taamatuttaaq atorineqassapput.

Imm. 2. Siulersuisut tunngavissaqarluarunik tunniussinissamut akerliussinapput.

§ 71. Piginneqataasup averusernerani, avinnerani, imaluunniit piginneqataasup aappaqarnerata atorunnaarsinneqarnerani apparliisuni arlaat piginneqataasutut ingerlaannarnissamut

pisinnaatitaaffeqassanersoq, pisariaqassappat akuersissuteqarnikkut eqqartuussinikkulluunniit aalajangerneqassaaq.

Imm. 2. Siulersuisut tunngavissaqarluarunik tunniussinissamut akerliussinapput.

§ 72. Piginneqataasup inooqateqarnerminik unitsitsinerani, inooqatigiinnerup unitsinneqarnissaa sioqqullugu piginneqatigiilluni inissiaammi minnerpaamik ukiuni marlunni ataatsimoorlutik aamma inuit nalunaarsorsimaffiat malillugu inoqutigiinniissimagunik, piginneqataasup piginneqataassutini inooqatigisaminut tunniussinavaa.

Imm. 2. Siulersuisut tunngavissaqarluarunik tunniussinissamut akerliussinapput.

§ 73. §§ 69-72imi taaneqartunit allaanerusumik pisoqartillugu, piginneqataassutini tunniussineq piginneqatigiilluni inissiatillit peqatigiiffiata malittarisassaanni maleruagassiarineqartut naapertorlugit pisinnaavoq.

§ 74. Piginneqataasooq piginneqataassutimi tunniunneqarnissaa pillugu siulersuisunut qinnuteqarpat, piffissaq inissiamit nuuffissaq aamma piffissaq piginneqatigiilluni inissiaammik misissuiffissaq siulersuisut piginneqataasullu allakkatigut isumaqatigiissutigissavaat. Piginneqataasooq misissuinnermut peqataanissaminik pisinnaatitaaffeqarpoq, aammattaaq suliamik ilisimasalimmik ilaqarluni.

Imm. 2. Misissuinnermi siulersuisut misissuinnermut nalunaarusiussapput, tassanilu amigaataasinnaasut sumiginnagaasimasinnaasulluunniit, siulersuisut piginneqataasup akisussaaffisut isumaqarfigisaat allanneqassapput. Piginneqataasooq tamatumunnga isumaqataanngippat, tamanna misissuinnermut nalunaarusiami allanneqassaaq, piginneqataasup isummersuutai nalunaarneqassallutik. Misissuinnermi illuatungeriit marluullutik peqataasimappata, misissuinnermut nalunaarusiaq misissuinnermut atatillugu illuatungeriinnit atsiorneqassaaq. Piginneqataasooq taassumaluunniit sinniisigisaa misissuinnerup kingunitsiannua nalunaarusiap assilineranik tunineqassaaq.

Imm. 3. Piginneqataasooq taassumaluunniit peqataanissamut piginnaatitaa misissuinnermut takkutinnippat, siulersuisut misissuinnermut nalunaarusiaq suliassanut, piginneqataasup akiligaanik suliarineqartussanut tunngavigissallugu pisinnaatitaaffeqarput.

Imm. 4. Suliassanut piginneqataasup akiligaanik suliarineqartussanut aningaasartuutit tunisinnermi iluanaarutissanit matussuserneqassapput. Piginneqatigiilluni inissiatillit peqatigiiffiata aningaasartuutai matussuserneqanngitsut piginneqataasumit inissiamit nuuttumit piginneqatigiilluni inissiatillit peqatigiiffiannut akilernerneqassapput.

§ 75. Piginneqatigiiffimmi inissiap tunniussinissaa sioqqullugu siulersuisut piginneqataalersumut uku tunniutissavaat:

- 1) Piginneqatigiilluni inissiatillit peqatigiiffiata malittarisassai.
- 2) Ukiumoortumik naatsorsuutit missingersuutillu kingulliit assilineri.
- 3) Piginneqataassummik tunniussinermi akiusup qanoq iliorluni naatsorsorneqarsimaneranut takussutissat immikkoortiterlugit allassimaffiat.
- 4) Piginneqatigiilluni inissiat pillugit Inatsisartut inatsisaat sukkulluunniit atuuttoq.

Imm. 2. Piginneqataassummut akiliutissaq piginneqatigiilluni inissiatillit peqatigiiffiannut akilernerneqassaaq, tassanngaanniillu pisassaasinnaasut ilanngaatigereernerini sinneruttut

piginneqataajunnaartumut akilerneqassapput. Piginneqatigiilluni inissiaatillit peqatigiiffiata annikitsumik naleqquttumillu piginneqatigiilluni inissiami piginneqataajunnaartup atuinnermut akiligassaanut kingusinnerusukkut matussusiinissamut immikkoortitsisinnaavoq.

Imm. 3. Piginneqataalersup piginneqataajunnaartumut allanik isumaqatigiissuteqarnissaa tunniussinnermi piumasarineqarsinnaanngilaq, tassanili pequtit aalaakkaasunngorlugit ikkussat, piginneqatigiilluni inissiaammut immikkut naleqqussarneqarsimasut ikkunneqarsimasulluunniit pineqanngillat.

Kapitali 10

Ilaasortaajunnaarsitsineq

§ 76. Siulersuisut piginneqataasoq ilaasortaajunnaarsissavaat atuisinnaatitaaneralu atorunnaarsissallugu, piginneqataasup:

- 1) Allakkatigut piumaffigineqarnerminiit kingusinnerpaamik ulluinnaat arfineq marluk qaangiunnerini akiligassani akilinngippagit.
- 2) Ineqarnermut akitsuutit akiligassalluunniit tassunga ilaasussat allat akilersimanngippagit, aammalu allakkatigut piumaffigineqarnerminiit kingusinnerpaamik ulluinnaat arfineq marluk qaangiunnerini akilinngitsuukkani akilinngippagit.
- 3) Siulersuisut akuersiteqqaarnagit piginneqatigiilluni inissiaat najukkani allamut attartortippagu, aammalu allakkatigut piumaffigineqarnerminiit kingusinnerpaamik ulluinnaat 14-it qaangiunnerini tamanna iluarsisimanngippagu.
- 4) Piginneqatigiilluni inissiaat najukkani najugaqarfiginngippagu, aammalu allakkatigut piumaffigineqarnerminiit kingusinnerpaamik ulluinnaat 30-t qaangiunnerini tamanna iluarsisimanngippagu.
- 5) Aserfallatsaaliuinissamut maleruagassat allakkatigut piumaffigineqarnerminiit kingusinnerpaamik ulluinnaat 30-t qaangiunnerini malissimanngippagit.

§ 77. Piginneqataasup qaammatit aqqaneq marluk ataannartut iluanni siulersuisunit allakkatigut minnerpaamik pingasoriarluni piumaffigineqarsimagaluarluni, piginneqatigiilluni inissiaatillit peqatigiiffiata torersaarnissamut maleruagassiaanik malinninnissamut pisussaaffini malinnngippagit, piginneqataasoq ataatsimeersuartut ilaasortaajunnaarsissavaat atuisinnaatitaaneralu atorunnaarsissallugu.

Imm. 2. Piginneqataasoq siulersuisunit allakkatigut marloriarluni piumaffigineqarsimagaluarluni § 57, imm. 2 aamma 4 aamma § 58 naapertorlugu inissiap iluani aserfallatsaaliuisimanngippat, tamannalu piginneqatigiilluni inissiaatillit peqatigiiffiata illuutaanik aammalu inissianut ataasiakkaanut ajoqusiisinnaanermik kinguneqarsinnaappat, ataatsimeersuartut piginneqataasoq ilaasortaajunnaarsissinnaavaat.

§ 78. §§ 76 aamma 77 naapertorlugit allakkatigut piumasaqaat allakkatut nalinginnaasutut aamma tamatsaalisatut piginneqataasup najukkamini allakkanik tiguisarfianut nassiunneqassaaq. Tamatuma saniatigut pisuni § 76, nr. 3mi aamma 4mi taaneqartuni, piumasaqaat piginneqatigiilluni inissiaammut piginneqataasup atuisinnaatitaaffigisaanut, siulersuisunut ilaasortanit marlunnit tunniunneqassaaq. Piginneqataasoq pissarsiarineqarsinnaanngippat siulersuisunut ilaasortat allakkat piginneqatigiilluni

inissiaammut, piginneqataasup atuisinnaatitaaffigisaanut tunniunneqarsimanagera atsiornermikkut uppersassavaat. Uppersaatip assilinnera erngerluni piginneqatigiilluni inissiaatillit peqatigiiffianni siulittaasumut tunniunneqassaaq.

Imm. 2. Ataatsimeersuartut imaluunniit siulersuisut piginneqataasumik ilaasortaajunnaarsitsinermik aalajangererat allakkiatut suliarineqassaaq, tassungalu allakkatigut paasissutissat uku ilaatinneqassapput:

- 1) Ilaasortaajunnaarsitsinermut tunngaviusoq, inatsisitigut tamatumunnga tunngavigineqartoq allallugu.
- 2) Piginneqatigiilluni inissiaat qaqugu qimanneqarsimassanersoq pisattallu annisereersimassanersut.
- 3) Piginneqatigiilluni inissiaammut matuersaatit qaqugu siulersuisunut tunniunneqarsimassanersut.
- 4) Piginneqatigiilluni inissiaat qaqugu misissorneqassanersoq.
- 5) Piffissap qanoq ilinissaata tungaanut ineqarnermut akitsuut, kiassarneq il.il. akilersorneqassanersut.
- 6) Aningaasartuutit allat suut piginneqataasup piginneqatigiilluni inissiaatillit peqatigiiffiannut taarsissanerai.

Imm. 3. § 76, nr. 1 aamma 2, aamma § 77 tunngavigalugit ilaasortaajunnaarsitsinermi, atuisinnaatitaaneq sivikinnerpaamik qaammammik ataatsimik sioqqutsilluni nalunaaruteqarnikkut atorunnaarsinneqarsinnaavoq. § 76, nr. 35 naapertorlugit ilaasortaajunnaarsitsinermi atuisinnaatitaaneq erniinnaartumik atuuttussanngorlugu atorunnaarsinneqarsinnaavoq.

Imm. 4. Imm. 2 naapertorlugu aalajangiinermik nalunaarut piumasaqaatip nassiunneqartarneratut nassiunneqassaaq, takuuk imm. 1.

§ 79. Piginneqataasoq ilaasortaajunnaarsinneqarpat, inissiamut piginneqataassutaasumut atuisinnaatitaaneq atorunnaassaaq. Peqatigisaanik inissiamik piginneqataassummut attuumassuteqartumik attartortitsinermut imaluunniit inigisamik allamut attartortitsinermut isumaqatigiissut atorunnaassaaq. Attartortup imaluunniit inigisamik attartortinneqartup isumaqatigiissut unioqqutissimanngikkaluarpaguluunniit tamanna atuutissaaq.

Imm. 2. Piumasaqaatip naammassineqannginnerani piginneqataasoq piumasaqaammik, ilaasortaajunnaarsinneqarnissamik kinguneqartussamik tigusippat, aammalu piginneqataasup piumasaqaat naammassiniarnagu aalajangersimappat, piginneqataasup attartortoq imaluunniit attartortinneqartoq ilaasortaajunnaarsinneqarnissaq pillugu nalunaarfigissavaa. Piumasaqaammik naammassininnissamut piffissarititaasup naaneraniit kingusinnerpaamik ulluinaat tallimat qaangiunnerini ilisimatitsissut allakkatut nalinginnaasutut aamma tammatsaalisatut attartortup imaluunniit inigisamik attartortinneqartup najukkamini allakkanik tigusisarfanut nassiunneqassaaq.

Imm. 3. Imm. 2 ilisimatitsisoqarsimanngippat, tamanna piginneqatigiilluni inissiaatillit peqatigiiffiata susassarinnigilaa aammalu attartortup imaluunniit allap attartortinneqartup piginneqatigiilluni inissiaq qimallugu nuunnissamik pisussaaffeqarneranut pingaaruteqarani.

Kapitali 11

Taarsigassarsiat erniaqanngitsut akilersugassaannigitsullu akiligassanngortinneqartarnerat

§ 80. Kommunalbestyrelsi allamik aalajangiaqanngippat, kommunalbestyrelsimit taarsigassarsiarititat erniaqanngitsut akilersugassaannigitsullu akiligassanngortinneqassapput, imatut pisoqartillugu:

- 1) Taarsigassarsititsinermi atugassarititaasut annertuumik sumiginarneqarpata.

2) Piginneqatigiilluni inissiaatillit peqatigiiffiata siulersuisui imaluunniit ataatsimeersuartut §§ 76 aamma 77 naapertorlugit piginneqataasumik ilaasortaajunnaarsitsinissamik pisussaaffimminnik naammassinninngippata.

3) Kommunalbestyrelsimit taarsigassarsiarititat saniatigut taarsigassarsiat allat, piginneqatigiilluni inissiaatillit peqatigiiffiata illuutaa qularnaveeqqusiullugu qulakkeerneqarsimasut atorunnaarsinneqarlutik akiligassanngortinneqarpata.

4) Piginneqatigiilluni inissiaatillit peqatigiiffiata illuut ilanngullugillu inissiat ataasiakkaat naammaginartumik aserfallatsaalinngippagit, aammalu kommunalbestyrelsimut qularnaveeqqusiissut ajorseriarsinnaappat.

5) Piginneqatigiilluni inissiaatillit peqatigiiffiata illuutaa minnerpaamik ikuallattoornissamut illuutillu ajoqusernissaanut sillimmaserneqarsimanngippat.

6) Piginneqatigiilluni inissiaatillit peqatigiiffiata inissiaatai § 55imi piumasaqaatit unioqqutillugit atorneqarpata.

7) Piginneqatigiilluni inissiaatillit peqatigiiffiata kommunalbestyrelsi taassumaluunniit aallartitaa illuummik ilanngullugulu inissianik ataasiakkaanik takuniaanerani isernissaanut tunngavissaqanngitsumik itigartippagu.

8) Piginneqatigiilluni inissiaatillit peqatigiiffiata ukiumoortumik naatsorsuutit kingumoortumik misissortinngippagit imaluunniit piginneqatigiilluni inissiaatillit peqatigiiffiata ukiumoortumik naatsorsuutit kommunalbestyrelsimut taarsigassarsititsisimasumut nassiukkumanngippagit.

9) Ukiuni tulleriinni marlunni ukiumoortumik nalunaarusianik kukkuneruunermi peqatigiiffiup pigisaasa nalillit akiligassaasalu, aammalu aningaasaqarnikkut inissisimanerata eqqortumik takutinneqarsimannginnerat tunuarsimaarfeqartinneqarpata.

10) Piginneqatigiilluni inissiaatillit peqatigiiffiat aningaasanik, pilersaarutaasumik ataavartumillu aserfallatsaaliuinissamut naammattunik akiliisitsisanngippat sillimmatissanillu illuartitsisanngippat.

11) Piginneqatigiilluni inissiaatillit peqatigiiffiat pilersaarutaasumik ataavartumillu aserfallatsaaliuinissamut pilersaarusiorsimanngippat.

12) Piginneqatigiilluni inissiaatillit peqatigiiffiat atorunnaarsinneqarpata, imaluunniit taassuma inissiaatai piginneqatigiilluni inissiatut atorneqarnerminnit allaanerusumik atorneqalerpata.

Imm. 2. Imm. 1 naapertorlugu taarsigassarsiarititat kommunalbestyrelsimit atorunnaarsinneqannginneranni, pissutsit aqqinneqarnissaat pillugu qaammammik ataatsimik piffissaliilluni tamanna piginneqatigiilluni inissiaatillit peqatigiiffannut allakkatigut nalunaarutigineqassaaq.

Kapitali 12

Missingersuutit naatsorsuutillu

§ 81. Piginneqatigiilluni inissiaatillit peqatigiiffiata ukioq naatsorsuusiorfigisaa qaammatinik aqqaneq marlunnik sivilussuseqassaaq. Kisiannili piginneqatigiilluni inissiaatillit peqatigiiffiata ukioq naatsorsuusiorfigisaa siulleq sivikinnerusinnaavoq sivilunerusinnaalluniluunniit, taamaattorli sivilunerpaamik qaammatinik 18-inik sivilussuseqarsinnaalluni. Taamatuttaaq piginneqatigiilluni inissiaatillit peqatigiiffiata piffissap naatsorsuusiorfigisassaata allanngortinneqarnissaanut atatillugu piffissaq naatsorsuusiorfiusoq sivikinnerusinnaavoq sivilunerusinnaalluniluunniit.

Imm. 2. Piginneqatigiilluni inissiaatillit peqatigiiffiat ukiumoortumik naatsorsuutit kingumoortumik misissorneqarnissaannut kukkunersuiusumik naalagaaffimmit akuerisamik imaluunniit kukkunersuiusutut nalunaarsorsimasumik atorfinitsitsissaaq. Kukkunersuiusoq kukkunersuiunermut inatsimmi tamatumunnga aalajangersakkat sukkulluunniit atuuttut naapertorlugit siulersuisunut nalunaarusiortassaaq.

Imm. 3. Kukkunersuiusumik naalagaaffimmit akuerisamik imaluunniit kukkunersuiusutut nalunaarsorsimasumik atuinissamut pisussaaffik sapinngisamik siusissukkut piffissani ukunani atuutilissaaq:

1) Pisinnaatitaanerup nalunaarsorneqarnerani.

2) Piginneqatigiilluni inissiaatillit peqatigiiffiata piginneqatigiilluni inissiaataanik atuilernermi.

Imm. 4. Naalakkersuisut pisuni immikkut ittuni piginneqatigiilluni inissiaatillit peqatigiiffiata kukkunersuiusumut naalagaaffimmit akuerisamut imaluunniit kukkunersuiusutut nalunaarsorsimasumit ukiumoortumik nalunaarummik kukkunersuiuinissamut suliakkiisarnissaanut piumasaqaammik saneqqutsinissamut immikkut ittumik akuersissuteqarsinnaapput. Saneqqutsinissamut immikkut ittumik akuersissuteqartoqassappat, kukkunersuiuinissaaq minnerpaamik naatsorsuutininik ilisimasalimmit isornartoqartinneqanngitsumit isumagineqassaaq.

Imm. 5. Piginneqatigiilluni inissiaatillit peqatigiiffisa missingersuutininik, ukiumoortumik naatsorsuutininik, oqaaseqaatinik kisitsisinillu pingaarnernik suliaqarnissaannut ilusiliinissaannullu Naalakkersuisut maleruagassanik aalajangersaasinnaapput.

§ 82. Piginneqatigiilluni inissiaatillit peqatigiiffiat, kommunalbestyrelsimit taarsigassarsilluni piginneqatigiilluni inissianik pisisimasooq, ukiumoortumik naatsorsuutit ataatsimeersuartunit akuerineqarneranni erngerluni ukiumoortumik naatsorsuutit assilinerininik kommunalbestyrelsimut nassiussissaaq.

Kapitali 13

Piginneqatigiilluni inissiaatillit peqatigiiffiannik atorunnaarsitsineq

§ 83. Piginneqatigiilluni inissiaatillit peqatigiiffiata atorunnaarsinneqarnissaa aammalu piginneqatigiilluni inissiaatillit peqatigiiffiata inissiaataasa inissiatut nammineq pigisatut tunineqarnissaat ataatsimeersuartunit aalajangerneqarsinnaavoq.

Imm. 2. Piginneqatigiilluni inissiaatillit peqatigiiffiata inissiaataasa inissiatut nammineq pigisatut tunineqarnissaat siunertaralugu peqatigiiffik atorunnaarsinneqassappat, tamatuma piginneqataasunit tamanit akuerineqartariaqarpoq.

Imm. 3. Atorunnaarsitsineq inunnit marlunnit isumagineqassaaq, taassumalu aappaa tassaassaaq eqqartuussissuserisoq, aappaalu ataatsimeersuartunit toqqarneqassaaq.

Imm. 4. Atorunnaarsitsinermi naatsorsuutit inaarutaasut piginneqatigiilluni inissiaatillit peqatigiiffiata kukkunersuiusuanit kukkunersiorneqassapput, aammalu piginneqatigiilluni inissiaatillit peqatigiiffiannut pisortanit taarsigassarsititsisoqarsimappat kommunalbestyrelsimut nassiunneqassallutik.

Imm. 5. Piginneqatigiilluni inissiaatillit peqatigiiffiata atorunnaarsinneqarnerata kingorna pisussutsit ilanngaaseriikkat piginneqataasunit, piginneqataassutsinut ataasiakkaanut naligitinneqartut naapertorlugit agguarneqassapput.

§ 84. § 83 imm. 1 naapertorlugu tunisinermut atatillugu piginneqatigiilluni inissiaatillit peqatigiiffiannut Inatsisartut inatsisaat manna naapertorlugu pisortanit taarsigassarsiarititat illuliortiternermut taarsigassarsiat malillugit paarlaassinermut taarsigassarsiarititassanik taarserneqarnissaat piumasarineqarsinnaapput, illuliortiternermut aningaasalersuineq pillugu inatsisit piffissami atuuttut imm. 2-mi allannguutit malitsigisai ilanngullugit.

Imm. 2. Imm. 1 naapertorlugu taarsigassarsiarititassat ullormit pisinissamik isumaqatigiissutip atsiorneqarfianiit ukiuni qulini erniaqartinneqassanngillat akilersugassaassanatillu, tamatumalu kingorna taarsigassarsiat angeqqatigiinnik aningaasartalerlugit ukiuni qulini akilersugassanngortinneqassallutik. Taamaattoq taarsigassarsiat akilersoqarneri kingusinnerpaamik piginneqatigiilluni inissiat peqatigiiffiannut taarsigassarsiarineqaaqaartut assigalugit aallartinneqassapput.

§ 85. § 83 imm. 1 naapertorlugu tunisinermut atatillugu piginneqatigiilluni inissiaatillit peqatigiiffiannut Inatsisartut inatsisaat siusinnerusukkut atuussimasooq naapertorlugu pisortanit taarsigassarsiarititat illuliortiternermut taarsigassarsiat malillugit paarlaassinermut taarsigassarsiarititassanik taarserneqarnissaat piumasarineqarsinnaapput, illuliortiternermut aningaasalersuineq pillugu inatsisit piffissami atuuttut imm. 2-mi allannguutit malitsigisai ilanngullugit.

Imm. 2. Imm. 1 naapertorlugu taarsigassarsiarititassat ullormit pisinissamik isumaqatigiissutip atsiorneqarfianiit ukiuni qulini erniaqartinneqassanngillat akilersugassaassanatillu, tamatumalu kingorna taarsigassarsiat angeqqatigiinnik aningaasartalerlugit ukiuni qulini akilersugassanngortinneqassallutik.

§ 86. Piginneqatigiilluni inissiamik pisisup tunisisullu namminneq pisinermut atatillugu aningaasartuutitik tamaasa akilissavaat.

§ 87. Piginneqatigiilluni inissiaatillit peqatigiiffiat atorunnaarsinneqarpat, aammalu inissiat siornatigut pisortat attartortittakkatut inissiaatigisimappatigit, tamatumunngalu peqatigitillugu piginneqatigiilluni inissiaatillit peqatigiiffiata inissiaatai inissiatut nammineq pigisatut tunineqarnissaat aalajangerneqarsimangippat, inissiat inissiatut attartortittakkatut nalinginnaasutut Namminersorlutik Oqartussanut imaluunniit kommunalbestyrelsimut inissianik piginnittuusimasunit tiguneqassapput. Piginneqataasimasut inissiani attartortutut najugaqaannarnissamik pisinnaatitaaffeqarput.

Imm. 2. Attartortitsisup qularnaveeqqummik attartortitsineq pillugu peqqussummi atuuttut naapertorlugit akiliisoqarnissaa piumasarisinnaavaa.

Imm. 3. Piginneqatigiilluni inissiaatillit peqatigiiffiata atorunnaarsinneqarnerani inissiat inissiatut attartortittakkatut nalinginnaasutut atorneqalernissaat pillugu Naalakkersuisut maleruagassiorsinnaapput.

Kapitali 14

Atuutsitsilernissamut aalajangersakkat aamma ikaarsaarnermut aalajangersakkat

§ 88. Inatsisartut inatsisaat ulloq 1. januar 2018 atuutilerpoq.

Imm. 2. Peqatigisaanik piginneqatigiilluni inissiat pillugit Inatsisartut peqqussutaat nr. 2, 16. maj 2008-imeersoq atorunnaarsinneqarpoq.

Imm. 3. Namminersornerullutik Oqartussat kommunillu inissiaataasa attartortittakkat teknikikkut

aningaasatigullu nalilivigineqartarnerat pillugu Namminersornerullutik Oqartussat nalunaarutaat nr. 9, 12. maj 2003-meersoq, Inatsisartut inatsisaat manna naapertorlugu aalajangersaanikkut allanngortinneqarnissami atorunnaarsinneqarnissamilu tungaanut atuutiinnassaaq.

§ 89. Qinnuteqaatit aamma akuersinerit pillugit piginnittut nikinnerat, taarsigassarsianik allanngortitsinerit, akilerneqartussat tulleriinnerini nikisitsinissamik akuersinerit, akiliinissamut naatsorsukkat, taarsiilluni taarsigassarsiarititat il.il., Inatsisartut inatsisaat malillugu kommunalbestyrelsimut nassiunneqartut, Namminersorlutik Oqartussat akiligassaqaqfullutik taarsigassarsititsinermut tunngassutillit, Namminersorlutik Oqartussanut nassiunneqassapput.

§ 90. Taarsigassarsiarititat aamma taarsigassarsititsinissamik neriorsuutit, ulloq 1. januar 2018 tunniunneqartut imaluunniit tamanna sioqqullugu akuerineqartut, atugassarititaasut allanngortinnagit ingerlateqqinneqassapput.

§ 91. Qinnuteqartut ulloq 1. januar 2018 sioqqullugu taarsigassarsitinneqarnissamik neriorsorneqarsimasut aammalu taarsigassarsiarititassat tunniunneqarsimanatik, qinnuteqaarneq malillugu Inatsisartut inatsisaanni matumani maleruagassat malillugit nutaamik taarsigassarsitinneqarnissaq pillugu neriorsuummik tunineqarsinnaapput.

Namminersorlutik Oqartussat ulloq 23. november 2017

Kim Kielsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

